

Un dopomisdì pai fruts cu “*La storie vere di Jack e Bee*” il gnûf libri pe infanzie in lenghe furlane

Sabide ai 13 di Zenâr aes 16.30 li de Biblioteche Joppi di Udin,
l'apontament dedicât ai plui piçui cun leture animade, laboratori e
il libri in regâl par ducj. Par partecipâ al è ben notâsi, dentri dai 10 di Zenâr

Un incuintri inspietât, un viaç emozionant che al segne il principi di une lungje e preziose
amicizie tra un frut speciâl, Jack, nassût intune piçule localitât culinâr dal Friûl, e un
peluche fûr dal comun, Bee, une avute che di tant timp e jere bandonade intune buteghe
di Birmingham, in Inghiltere.

Cheste e je la storie contade intes pagjinis di “La storie vere di Jack e Bee”, il libri par fruts
in lenghe furlane publicât de Cartostampa Chiandetti in colaborazion cu la ARLeF –
Agenzie regionâl pe lenghe furlane. Scrit di Alessandra Guadagnin, al conte di une
amicizie speciâl par ricuardânus che crodi in se stes e intai propriis siums al è une vore
impuartant. “*L'avignî al è di cui che al crôt ae bielece dai sei siums*”, e recite la citazion
iniziâl dal libri.

**Sabide ai 13 di Zenâr, aes 16.30, te sezion “Moderna” de Biblioteche Civiche
“Vincenzo Joppi” di Udin** (rive Bartolini, 5), in graciis de colaborazion tra ARLeF, Comun
di Udin e Chiandetti, il test al sarà proponût ai piçui letôrs (etât dai 4 ai 9 agns).
Daspò de leture animade dal libri, une copie e vignarà regalade a ducj i fruts presints, al
sarà un laboratori creatîf cu la âf Bee.

Di là dal invî a partecipâ, la autore, che e sarà presente al incuintri, e à marcât che: «*Al è
fondamentâl insegnâur ai fruts la impuartance di rivâ a viodi il biel che al è dentri di nô e in
chei altris. Ognidun al puarte dentri di se une valisute siore di talents, si à dome di vierzile,
cjâlâ dentri e doprâ i struments che si àn par fâ vignî fûr lis propriis fuarcis. Par chest motîf
o vuei invidâ i fruts, ma ancje cui che ju educa, a discuvierzi i lôr ponts di fuarce, a
acetâju, amâju e nudrîju, cemût che si fâs cuntune plante par che e cressi sane e fuerte (e
contente!)*».

Par partecipâ ae iniziative al è ben **notâsi dentri di miercus ai 10 di Zenâr** telefonant al
numar 0432 1743400 o scrivint une e-mail a info@sportelfurlan.eu

Udin, ai 4 di Zenâr dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<